

適園叢書

張宗祥



通國書香

吳昌碩



滋溪文稿卷第二十

碑志十四

皇元贈通議大夫翰林直學士上輕車都尉滎陽郡侯

鄭公神道碑銘

并序

至元六年三月甲子朝列大夫冀州戶騎都尉滎陽郡伯鄭公進封通議大夫翰林直學士上輕車都尉滎陽郡侯其子既焚黃告祀家廟又將勒銘表諸幽阡於以發公潛德彰朝廷之寵光覆被子孫於無斁乃屬天爵爲之辭維鄭氏真定冀州棗強人家世以才武著顯我國家初入中原命太師國王招集豪傑戡定未下城邑公世父義帥其鄉人來歸累官龍虎衛上將軍元州兵馬都元帥公之考甫亦以戰功遷同

知冀州節度使事兼管民萬戶昆弟子孫爲統軍元帥萬夫
長者十餘人千夫百夫長者又十餘人宣慰使御史郎官守
令者二十餘人門閥之貴推次甲乙近代所未有也公諱澧
爲同知節度之第十七子惟節度使有子十九人公性高潔
雅不樂仕曰俱仕固榮矣祖宗墳墓其誰與守乃營別墅棗
強之永川里務躬行實履絕去世俗華靡之習課家人治耕
桑蕃畜牧伏臘以供祀事衣食既有餘饒推之以周宗親次
及鄉鄰之貧者鄭氏族大且盛或貧乏鬻其世分田者公贖
而還其人不責我償也飢者分粟以活之男女未室者給資
妝以嫁之死不能殮者槨之蓋以卹災解紛爲心未嘗懈也
每思祖考俱有勞烈於國樹立豐碑紀述成績慮有風雨剝

裂之憂構華屋以覆之又築室於先墓之側以待展省之至者焉其居家也恆以孝友睦其昆弟春秋浸高衣冠尊肅動履康寧一話一言皆可爲法歲時子孫來謁車騎之盛朱紫之華列拜庭下公雖以家世崇高爲榮而復以富貴滿盈爲懼戒子孫以先世驍勇發身忠義報國汝宜奮勵勿墮先訓邑有孔子廟公兄元帥宣靖公渤所建歲久傾圯公一新之俾士有所受業事母至孝旨甘克盡其養事兄能順田園悉推讓之及卒室無餘財惟祭器圖書而已宗族鄰里之人始而愛久而化旣沒而猶思焉公享年七十有八至順三年八月十有八日卒九月十有八日葬棗強之南留馬原元配劉氏事舅姑以恭相君子無違德享年八十有六後至元三年

八月某日卒。合祔公墓。累封滎陽郡夫人。子男三人。曰鄒曰郭。曰郊女二人。適張氏王氏。孫男十人。敦復至臨。由頤素履。撫謙允升。其四人幼。鄒以世家子宿衛內廷。出官從仕郎。開城路總管府判官。歷陝西行省管勾。鄆州同知。武衛經歷。進朝列大夫。知同州。入提舉備用庫。出知慶陽府。陝西行省理問。遷奉元路總管。積階通議大夫。國家之制。凡由宿衛官某方者。始終不離其地。惟關輔聽中書注擬。他省則三歲一遣。官調之。鄒官關中既久。臺憲屢表廉能。蓋其慈祥豈弟之政。皆公孝弟忠信所由化也。故推恩之典。上賁於公。諸孫皆入成均。爲胄子。敦復以待儀舍人擢山東憲掾。今官從仕郎。太常太祝。嗚呼。公躬行於家。而人化於里。非有過人之才。克若

是乎使公登用於時其官勲必與昆季相埒無疑也公旣弗
欲顯聞奈何使之湮晦而無所傳乎是宜有銘以著於世銘
曰

維古名族德澤深長才子賢孫奕世蕃昌生長食息不離典
訓自家在邦允著令聞冀有鄭氏聿爲名門昆季眾多其盛
如雲桓桓將軍侃侃御史郎官守令冠蓋盈里公生其閒獨
采靜嘉持身孔嚴惻惻無華夙夜奉親旨甘畢具顧瞻工隴
雖老猶慕家有餘饒惠我宗親匪惟宗親施及鄉鄰孝友恂
恂是亦爲政尙熹爾後克嗣其慶我銘公墓匪表其私吁嗟
里人過者是思

皇元封奉議大夫鉛山知州驍騎尉涇陽縣子張府君

墓碑

至正甲申余遷官西臺覽河山之高深省風土之敦厚意其
必有豪傑之才高尚之節可以爲世楷範而士農之眾亦必
有孝友信義可以興起俗化者焉未幾南臺御史張侯以先
世遺事來請曰儆之祖父以好義聞蓋上承祖宗之志下燾
我後人以化其鄉閭者也今將樹碑墓道願爲文以表之昔
余佐中臺幕府侯方爲掾繼遷掌故益交游厚善考其先世
遺事曾祖墓碣集賢學士蕭公所作祖父薤銘
太子贊善同公述也二公皆昭代碩儒闕輔高士顧余敢附
其後乎已而赴召入朝侯亦持節按行四川六詔及余參預
江浙省政侯又適長幕府後以墓碑爲請乃爲之文曰奉元

路之北若干里龍橋鎮者張氏家焉其地本屬耀州之三原縣職方氏以三原邑小不足以域民龍橋市井繁衍故遷縣治居焉君諱德明字彥明賦性淳質其爲人廉靖忠厚少學詩書言動悉遵軌度篤於養親未嘗暫離左右或勸之仕則曰富貴非不欲也若舍吾親遠游甘旨將誰致乎初張氏在金以醫術爲業至君考則曰醫人命所係益重事也吾以中人之資豈可易爲之哉當國家戡定之初原野方闢加以雍土肥沃乃帥家人治農務歲連大穰家用饒裕遂大振施於人久之以孝義名一方蕭徵君所以表其墓也及君代理家政尤輕財好義曰此吾親宿昔之志吾朝夕恆懼不克繼之有張澤者因屢婚嫁假貸於君積負甚夥君憐其貧一不責

償取其券焚之邑人李和雲陽李仁皆爲隸於人其家欲得錢縱之爲民聞君尙義輒往請焉君哀矜其人以私錢數千緡畀之仍爲經紀其家是其書於同公薤銘者特一二事其他不及書者尙多有之推君之心蓋本乎惻隱濟之以惠利非期欲人之知亦非覲人之見德也君嘗曰今海宇承平年穀豐足若鄉校不修則無以興治化師道不崇則無由識禮義乃倡縣侯買地建夫子廟及學舍門廡而締構像設之費出於君所施者居十之五遠近觀感爭遣子弟就學讀書習禮以變其俗君教子孫極嚴必擇賢師良友與之游處殆知古人爲己之學故修身涖政肅然有法蓋君之治家勤以中節儉而合禮祭祀盡孝燕享致豐誠以接人敬以持己鄉邦

無賢愚悉推爲君子長者君春秋旣高以子貴封奉議大夫
鉛山知州驍騎尉涇陽縣子是日宗族閭里咸來致賀子孫
以次奉觴獻壽遠近觀者以爲榮享年七十有九以至治一
年二月二十七日終於所居正寢配李氏先十二年卒贈涇
陽縣君柔順恭恪克修內事是歲五月十有七日合縣君之
喪葬於縣之常平鄉悌友村先兆君祖諱順考諱貴祖妣馬
氏妣孟氏馮氏白氏君白氏出也子男世英同知鐵州軍民
事世昌敦武校尉脫思麻路新附軍上千戶佩金符累贈中
奉大夫兵部侍郎上騎都尉清河郡伯世杰承務郎同知松
潘客壘威茂等處軍民安撫事佩金虎符終奉議大夫同知
河州路總管府事世榮承務郎僉海北廣東道肅政廉訪司

事終繕工司丞孫男曰信曰儁世英子也信中政院管民提
領曰儼曰儼世昌子也儼由奉政大夫嶺北湖南道肅政廉
訪副使遷江浙行中書省左右司郎中曰佖曰佖世傑
子也曰佖世榮子也習進士業貢於鄉信之子履陝西行臺
掾儼之子晉儼之子恆升曰王諒米安仁女之夫也曰段珪
李溫李居仁黎思恭楊敏王炳段永貞宋德新孫女之夫也
嗚呼古之君子施而不求其報三原張氏自孝義君樂分施
而耻積藏至奉議君克紹先志惠及鄉邑子孫昆季列官風
紀遂爲縉紳聞族然則感應之理益可徵乎銘曰
關輔之右風土高厚惟人之生克孝而友有美張氏世以義
聞施與其親惠及鄉鄙釐身於家康寧豈弟施於孫子益大

以侈總戎邊闡執法憲臺輝光日新福祿鼎來世有鄙夫多
藏厚積遺及後人鮮有弗失積而能散其心孔仁已弗求報
天福善人鄉有碩儒薤銘燁燁揭文豐碑永示來葉

元故兩浙運司浦東場鹽司丞楊君墓志銘

君諱居義字子宜姓楊氏故中書參知政事居寬從兄弟也
其先由華陰徙汴宋宣和閒有諱綱者司易州儀曹事城陷
死之贈朝請大夫其子邦基擢金天眷二年進士第以文藝
擅名官祕書監既老拜通奉大夫永定軍節度使生奉直大
夫郊社署令皓皓生監嵩州酒庭直庭直生淵是爲君考國
初爲百夫長卒官鐵冶提舉君少負奇氣南游江淮當路者
以故家子薦之然所司者不過米鹽之細巡邏之勞君念母

孫夫人年高急於祿養在官皆舉其職未嘗以爲卑也及佐
定海始得治民而監尹皆缺歲仍大饑民多徙死君撫諭有
方又值倭人作亂火城市殺吏民帥府命君供儲峙事集而
民不擾賊平眾皆推君才可大用而君老矣君素貧事母至
孝嘗承省檄當如京師徬徨不忍去母曰汝旣委身從仕勿
以吾爲念也君不得已北行比還母以天年卒君終身以爲
痛焉君貌魁梧美鬚髯清白廉靖蓋家法也晚歲刻意讀史
歷考古今治亂得失談說如在目前嘗曰吾少罹多故今勉
強向學寧戚所謂老而學者不猶愈於坐致怠惰乎君初娶
李氏燕中士族繼室沈氏子男曰昱卒於福建道廉訪書吏
曰旭由中臺察院掾爲浙西道憲司照磨其曰晟曰曇者佗

姬出也女四汴人吳鐸王某莘縣徐某宛平張文魯其壻也
孫男某某君初起家常州酒使歷鎮江圖山巡檢嘉興海鹽
尉會升海鹽爲州改建德漳安尉慶元路務副官進義副尉
主定海簿遷進義校尉兩浙運司浦東場鹽司丞享年六十
有五延祐元年八月朔日卒稚殯丹徒汝山原楊氏自祕監
始家燕嵩州府君占籍東昌莘縣別北邑之西廉原旭將卜
以至正某年某月某日葬君莘之先塋銘曰
華陰之陽由漢涉唐族姓蕃昌宋金百年時屢變遷世載衣
冠君多孫子益大其系惟德之自歸葬於莘土厚俗敦銘詩
不泯

大元贈朝列大夫祕書少監董府君墓碑銘

朝列大夫御史臺都事董之用拜江北淮西道肅政廉訪副使將行來請曰先君少負奇氣思自奮拔喜讀孫吳兵法習騎射昔至元中丞相淮安忠武王總兵伐宋收攬豪傑分任將佐或以先君名薦丞相與語奇之乃命將兵從行攻城野戰躬冒矢石立功居多所過郡邑惟務輯綏未嘗枉殺一人賴以生者無慮萬計宋平北歸游優里社卒不言功於時先祖先伯父皆已卒祖母年高甘旨滫瀡克盡孝養祖母旣終築廬墓旁啜粥飲水哭泣三年猶初喪也聞者嘉其孝卒喪事寡嫂有禮撫諸姪盡恩義衣服飲食不先已子田廬所入悉以歸嫂嫂卒諸姪求分財異居凡屋之華好田之肥美者悉令諸姪取之乃前之用等曰吾地雖磽瘠屋雖弊漏我自

安之汝兄弟輯睦有立勿憂家不肥也久之資用益饒宗族
朋友之貧者周之有差於是郡守邑宰咸高其行事多咨焉
里閭李氏子或誣殺人獄具先君爲辯其誣李氏子得不死
殺人者亦獲此先君行事之用得於家庭見聞不誣者也夫
善積於躬不享其報委祉於後而獲顯榮宜表墓石昭示永
久余嘗同官其爲之銘按董氏河南洛陽人世有隱德君諱
清字伯源昆弟三人曰深曰溥君於次爲第三曾大父洪業
家洛之北邙山墾田千畝積粟萬鍾遇凶歲輒施粟以振鄉
鄰大父裕父歷名有才略省府交辟辭不應深居自樂以終
其身母葛氏娶牛氏子男三人大用君用之用女四人嬉適
張誠婉適王課嬪適辛泰好適楊享孫男某某之用擢南行